


清容居士集

附札記

一一





清容居士集

附札記

(一十)

袁桷撰

清谷居士集卷第四十

啟疏附

回宣城郭教授雷煥

江左諸賢。夙慕敬亭之山水。洛中九詠。肯言京邑之風塵。擔簦而賜壁一雙。馮軾而下城七十。奇節矯亢。高名激昂。伏惟教授學士。藻思春雲。丰神秋月。子綦隱几。立言深愧於炎詹。林宗墊巾。置論匪鄰於危覈。脫穎悟折衝之敏。發矧窮肯綮之情。流涕力疏於治安。多病恥陳其封禪。懷章宿邸。知富貴之有時。棄繻入關。審功名之可卜。方盛世興賢於郡國。詎長才抱道於草茅。雲龍類從。冥鵬運徙。遴選金臺之彥。孰敢居前。深藏寶劍之篇。豈宜緩後。方爭求而識面。謂鼎來以解頤。顧懷刺而卻行。將舉扇以疾避。長箋鯨掣。蔀室珠輝。桺學殖塵荒。經畬德墜。儒林丈人之源委。老矣亡傳。子墨客卿之詞華。終焉自失。每念空餐而增戾。誠思拔茹以避賢。位卑語輕。望淺任重。吾徒掌帝之制。弗稱絲綸。君子贈人以言。有慙斧藻。永釋其旨。不知所酬。伏希亮察。

荅郭山長

家近神山。那有望瀛之想。祿尸玉署。每慙玩歲之差。將賦式微之歸。忽膺連茹之寵。捫心悸惕。揆分僥躋。桺智不逮人。器非越衆。老而能學。永希先世之勤。樂以忘憂。欲述聖門之志。考茲盛代。尊彼儒流。選部推

毛之精。崇文拔犀之舉。謂南士後至。難效盧前。而靈胄遠尋。所宜隗始。白駒空谷。振鷺西雝。有來琳瑯之書。彌重錦繡之段。客師之遇。跛男子似若倒之。汾陽之許。謫仙人于今驗矣。裴藏是謹。傳誦惟驚。

回府學觀禮

瀛州清切。甫賦歸休。泮水肅雝。適嚴秩祀。方謹陪庭之儀注。遽承巽牘之詞華。進執豆籩。升聞金石。惟素王道德之懿。合蒼姬文質之宜。謂巍坐光榮。不幾淺陋。而成令炳著。斯爲故常。深嘉絜己以作新。共企傳恭而復舊。奉璋相事。敢居髦士之先。執禮導前。難免鄙人之誚。

荅朱生

一還故里。分安野鶴之閒。三入承明。衆哂黔驢之技。櫛髮淒其已化。捫心省以獨慙。粲然霞裾。申以冰繭。蒨室獲兼金之耀。衡門駭織翠之奇。伏惟賢良學士。汗簡功深。章編思切。議詞章之弊。肇於揚劉。發騷雅之幽。擬於屈宋。單出雜比。爲律呂五采一就分等夷。靡然變藻績之工。綽矣成灝噩之古。然而明理者鄰於直致。脩辭者萎於曲裁。謂箋記止媚上之文。能之實少。而制誥得儼衆之體。作者猶難。桷金匱世官。青箱家學。嘗自處於木雁。深有哂於土龍。史乏三長。敢述馬班之制作。經迷五始。莫推啖趙之淵微。事與願違。志隨年往。幸覩清脩之標度。得據磊落之襟期。針芥有投。漆膠彌固。贈以繡段。拜雖亟以莫辭。酌彼金罍。禮未成而先醉。輪囷有感。厓略是酬。

回楊編脩

綴班玉署。帳諸老之川流。管秩金華。撫微躬而涯返。選由鼎鼐。事駭搢紳。方虞按劍之疑。忽荷遺珠之贈。伏惟編脩學士。文裁錦段。思湧繭絲。目無全牛。論固輕於餘子。智專老馬。語或齒于陳人。每憐炳燭之勤。能破炙轂之辯。嗜同昌歆。玩比懸黎。旣接壤於片雲。復盍簪於中禁。事云有幸。時不偶然。桷久困京塵。宜收朝蹟。望蓬萊隔弱水。肉羽難勝。歸鄉里授諸生。丹心尙爛。敢因褒拂。庸寫摧藏。

賀臧戶曹七十

光分華旦。瑞啟希齡。兕觥以躋公堂。允資裨贊。鳩杖而游鄉校。實賴主維。人瞻壽骨之有傳。天挺蜚聲而彌壯。桷陪游再世。縻繫一官。望廣額之彭龜。雲煙繚緲。想脩容之姑射。冰雪湛凝。侑慶薄儀。別陳副楮。

回韓知州

伏承劄翰。俾篆碑顏。詳讀再三。莫殫萬一。靖惟先正按察相公。智謀超俗。勇略立勳。東西戰壘之出奇。左右屯田之擇便。矢穿楊葉。形弓昭大帝之恩。斧破豫章。金符儼百神之助。烏府藹澄清之譽。紫樞彰鎮靜之謨。薦士惟公。共擬巨源之識量。聽訟以理。未夸廣漢之精明。至若更異代而振家聲。以孤兒而傳官牒。績爲罕匹。人所難能。編摩已著於穹碑。揚厲宜歸於汗簡。伏惟節使相公。窮神述事。立身揚名。繼世象賢。牧守之任相接。爲政以德。撫字之念彌加。安陽之圖譜可尋。潁川之風猷如在。昔聞惟二。今見其三。某演誥罔功。紬書無補。龜趺鳳最。幸附驥以託名。螽尾參差。願濡毫而作傳。尙賒參觀。統祈鑒融。

壽史允叟

數周甲子。壽開絳縣之年。瑞後中和。慶萃金閨之彥。槐堂馥郁。榆社歡榮。伏惟某官。服食頤神。希微養智。撫松筠而閱歲。霜雪不移。調茵鼎以樂天。煙霞自得。方將友安期於瀛海。揖子晉於緱山。坐觀盛衰。笑視今古。招邀親黨。願成二老之風流。約集耆英。共繼九賢之真率。薄儀侑祝。副楮別陳。

堃甥定鄧氏

西州勝士。久欽翰墨之芳。南國故家。自笑冠裳之冷。幸託根于外氏。獲聯蔭於清門。不假揄揚。遂諧婚對。伏承某封□□。德參女史。訓服姆師。從子公堃。習有童心。才猶凡品。每慙鐵鑪步之誚。敢意玉鏡臺之緣。敦義有加。申盟無斃。陳不腆之幣。爰以敬初。叶和鳴之占。永言綏後。臨風瞻倚。執筆感愉。

趙氏請婚代作

明珠當道。愧無因而至前。幽蘭深林。敢不採而自佩。庸假蹇脩之力。允諧懿氏之自。伏惟某人。朗鑒冰清。義襟河潤。品題吾黨。合閭里之衣冠。繹藉斯文。振家庭之詩禮。有懷聯事。歸擇賢宗。不煩千金之致詞。端藉七寶之合月。翠屏宜晚。行參羣從之游。白水同心。益覲片言之助。輒干將命。恭俟報音。

長女許適趙氏

西府垂芳。遺編僅守。北門視草。一疏獨高。興懷二老之盍簪。屈指故家之傳笏。前言儼在。嘉命是恭。伏承令姪同知。壯慕直清。任版方堅於冰蘖。而桷長女某。幼遵婉婉。闔儀蠡習於絲麻。眼空餘子之隨羣。人議乃翁之擇壻。察其素履。終以淡成。萬里遠歸。自訝子平之拙。百年偕老。願諧敬仲之占。腴禮莫酬。副書以

載。

次女許適趙氏

伏以漢庭甲乙。曩已託於同年。商邑後先。適相符於十載。仰止青雲之素。歸然喬木之存。施于孫曾。成爾姻婭。伏承長令嗣學士。思深象管。譽已藹於階庭。而桷第二女某。工謹罄絲。職麤遵於閭奧。未習競夸其侈靡。吾徒宜守以儉純。此道清風。斯盟白水。仕非爲貧也。願早觀金題玉璽之奇。言得無訖乎。已預述竹筭練裳之簡。有嚴報禮。庸謹副械。

回余氏議姻

成季之勳。象賢是嗣。有媿之後。教順惟慙。念脩程方歷於冰霜。而賤跡幸安於田里。事適相偶。時何敢違。聿來金薤之華。申告瓊茅之吉。悉蠲繁縟。以奉周旋。直道而行。固官箴之攸謹。外言不入。在梱範之必嚴。匪惟弱息之有歸。益見清門之足法。奉板輿而調鼎膳。所願事姑。入玉堂以復家氈。敢云傳壻。莫據喜臆。庸致規言。

季女許適余甥

百年事契。仰止高曾。再世婚姻。施于姑姪。念造端於幼歲。獲締好于今辰。允自氣同。抑光肺附。伏承令姪。灑掃應對。久遵壽母之規。桷女。保抱攜持。夙賴大家之訓。展也衣冠之緒。凜然弓冶之傳。人亦有言。吾爲此懼。魯衛兄弟。禮已判於立談。秦晉舅甥。事益難於坐視。勉焉亢植。稱爾獎提。

叔女許適史氏

秦晉甥舅之國。論世可知。朱陳嫁娶之村。披圖儼在。惟華閭孰比肩而擬。乃衡門爭接踵以前。盛德有容。寒宗奚讓。伏承令姪孫承奉。衣被儒素。綺襦之侈靡聞。而桷女服習女工。蟬絲之精未解。念游宦久塵於當路。而婚姻馴致於失時。立談璧雙。訂諾金百。練裳未備。敢云九十其儀。鐵硯可傳。行奏三千之牘。

回史氏聘

宦路因循。莫酬宿諾。相門清邃。猶守舊規。荷崇篤之愈加。審姻婭之攸自。書來尺素。禮重兼金。歌擗梅之詩。懷惟有慊。效投瓜之報。愧莫可言。

瑾請婚史氏

元老傳宗。專清名於碧沚。彌甥承緒。徵餘福於滄洲。百年婚媾之孔昭。再世姻親而允著。伏惟某官某封。□□□內闔服習。手絺繡以益精。而桷男辟水從游。躬簡編而麤謹。唯閭閻吾徒之當保。何閭閻餘子之爭前。謝彼濁流。成是古道。納采用雁。欲男女之及時。端策拂龜。審公侯之復始。敢陳薄禮。庸載副械。

牟氏招贅書代作

中年婚對。每深禮本之思。晚歲家聲。猶守儒林之舊。盟既諧於築館。事宜免於御輪。老矣無能。視之猶子。伏承令嗣。學精細帙。才詎止於目前。而某女某。功謹蟬絲。情難離於膝下。受餐願同其甘苦。奉匱深謹於寒溫。既重久要。敢辭先施。青氈硯在。敢言翰墨之有傳。銀燭屏開。豫卜門闌之多喜。

疏

易州文廟疏

聖人之道。極覆載莫得而名。神明之通。若淵泉無往不在。維上谷之古郡。實陪京之奧區。脫戰國任俠之風。服五經仁義之訓。化行衿佩。家有衣冠。然而揭虔妥靈。廟堂之制未舉。設儀辨位。簋豆之禮莫施。雖像設之教。敗於後人。而神棲之宮。見乎累代。事關我輩。天祐斯文。泮宮作詩。願同功於史克。鄉校有頌。豈專美於鄭僑。敢不盡心。聿來胥宇。羣飛鳥革。佇看不日之成。玉振金聲。共享無言之化。鄉閭樂助。庠序增榮。

贈陳無我淩波圖疏

右軍換鵝經。不了生前之債。東坡賣馬券。要求身後之名。然而畫餅豈足充飢。須信望梅亦堪止渴。菊南道人。璫璣古學。瑚璉雅材。江漢秋風。付經綸於獨笑。冰霜晚歲。寄漫浪於一官。食苦茗而論事不休。坐胡狀而倚聲自若。寧爲雞口。任刮龜毛。丈夫豈願憐。出門何礙。平生不道乞。對鏡奚慙。信天公之記已成。孔方兄之交頓絕。雪車豪士。會須奪吏部之金。秋水達人。寧復貸監河之粟。知心惟一。具眼無雙。

張玉田歸杭疏

采藥神山。悟朱顏之今昨。呼猿靈鷲。勞清夢之去來。要當青轡布襪。徒步徑歸。誰信黃絹色絲。空言何補。弄笛恨。漫雲慘澹。坐窗惜。江月淒涼。落葉孤尊。無復金貂之慷慨。古梅千檻。空懷玉照之風流。食肉之相。已非。解牛之技焉用。焦桐未遇。斷木自慙。風雪江湖。肯後當時之置驛。交游金石。定先桑子之裹糧。鄙騎

驢灞上之寒。遂跨鶴揚州之願。膝行而謝。稱載以歸。燈火話平生。慰老弟兄之白髮。詩書娛晚歲。還名祖父之青氍。恩極無言。情陳有覲。

周可竹移居疏

借車載家具。已知生理之疏。騎馬傍人門。可怪言辭之拙。相期青眼。少尉白頭。可竹教授。清比叢蘭。臞如野鶴。無殘盃冷炙之色。有簞食瓢飲之安。鼓琴授生徒。近馬季長之標致。隱居任漁釣。入方玄英之品題。幾經茅屋之秋風。厭聽小樓之春雨。烏鵲三匝。鷓鴣一枝。欲尋菟裘之謀。難課兔園之效。昔和靖處士享西湖之樂。不以告人。然康節先生買天津之居。嘗聞醪衆。既自慙於敗口。要當會於知心。不惜一言。毋煩婁請。門多長者。共成來往之歡。尊有賢人。不廢倡酬之適。鄉閭佳話。湖海高風。

許路教入館疏

代人作

道喪於千載之餘。談經者逐章句之末。士奮於百代之後。言理者析天人之微。不有淵源。孰爲矩範。某人學優聖域。譽藹儒林。光風霽月之心胸。莫窮其蘊。清泉白石之志趣。所養者深。名羞少室之山人。衆羨關西之夫子。得英賢而教育。終愧顓蒙。美盛德之形容。莫殫善頌。卻前而請。虛左以迎。

趙太社刻春秋法度編疏

列國寶書。慨混茫而亡紀。三陳鐵槌。洞消息以深憂。永瞻黍離之遷。迄成葵丘之會。蒼姬凜在。素王是專。攷牛耳之盟。悉淪於誣矯。推麟趾之應。莫掄於衰頹。匪惟凡例之嚴。是曰筆削之正。然而隕星退鷁。非有

貶褒歸貶求車實淪典禮直書其事足以誅亂臣之心曲說以箋殆有若法吏之口三傳角立羣儒狐疑維昔師臣侍經白虎今有賢子紹業青氈討論無敢向之嫌文獻續間平之美年運往矣風猷儼然幼讀父書若擣珍以和於舉鼎老嚴家訓雖嗜芟猶守於加籩泯然鄉校之闕遺懼爾世卿之淪靡願廣傳於琬琰庸不墜於箕裘白首書成允遂殺青之志清門人在益章壽梓之功

戴先生刻遺文疏

羊公峴山之碑深懷身後白傅雞林之集豈較目前是以壁中之藏咸嗟其斷缺航頭之獻或議其改更念茲汗簡之勞多孰若壽梓之功博生乎今者嘗忽夫近志于古者或知其非爰舉耆先以告茂異剡源子少負奇志晚成大名漱六藝之菁華窮百世之源委如得溫璞以成連城之璧若哀吉金以合四懸之鏞世方尊崇老益平實夫既人慕其學是宜家有其書失今不圖斯咎誰執十年之計在木庶得廣傳同心其利斷金允宜共贊不在是舉曷成斯文穆參軍市上之酬敢求美價蔡中郎帳中之陋徒蔽脩名

尙仲良刊醫書疏

類長沙張仲林書爲十圖

欲觀日月星辰疇咨繪畫多識鳥獸草木具訓傳模矧左圖右書之教備存內榮外衛之微莫辨張長沙類四證以明治病之本朱南陽衍百問以推用藥之原其書雖完厥理難究爰有多聞之士聿成一覽之圖考百藥之君臣推五行之母子分弦濤於坤艮別表裏之陰陽若游建章咸旁通其門戶猶入武庫悉能名其甲兵允得於心如指諸掌欲推己而傳世必假衆以全功張廣樂於鈞天詎資聽瑩挂高堂之素

壁端便覽觀。共勉揮毫。所期刻楮。

陳晦父致仕還家疏

挂冠神武。注晚歲之蟲魚。歸老鑑湖。了餘生之麴蘖。駭士林之一見。合選部之二宜。喜在眉端。春生足下。湖西致政陳教授。長材韞匱。敏手斲輪。破帽塵侵。不辨支離之粟。矮簷風急。徒賡骯髒之歌。鳥信天以無愁。楊厄閨而彌老。李太保亦爲之惠米。固以眼青。蘇司業時賴其與錢。終憐頭白。漫浪江湖之迹。淒涼山澤之癯。囊無一錢。室如懸磬。扁舟下吳會。願共謀屏屨之費。騎鶴上揚州。庶益遂衡門之樂。

金陵鄭生應炎道士疏

北闕上書。著詠受噴於唐主。南山種豆。貽言增禍於漢朝。生也有涯。安之若命。金陵鄭生。精神玉絜。辭辯春霏。負笈登途。謂功名之來可立致。下帷講道。審義理之得爲無窮。淒涼灤水之情懷。隱約金陵之夢寐。將置身於方外。行抵掌於人間。柱史猶龍。匪宜尼之私論。塞翁失馬。詎莊叟之寓言。斷于乃心。告茲多士。青精顏色。深培橐籥之功。白日羽翰。必假刀圭之助。淪盟天厭。效義風從。

真定劉謙父葬母疏

貧乃士之常。命有拘而淹屈。孝爲行之本。力不逮以因循。歷觀聖賢。夷考傳記。脫驂之贈。成於斯須。挂劍之酬。定於往昔。蓋惻隱爲人之固有。而慷慨則世所共難。謙父提舉。臺閣蜚英。江湖漫仕。郎潛衰矣。蘊百甕以自怡。吏隱蕭然。粟五秉而誰助。假牆壁以葬其先母。閱歲年莫返其故居。雲聳松楸。難合延平之劍。

煙迷鄉國。似隔蓬萊之山。傾麥舟則蓋有其人。指米廩亦當繼其事。古推任恤。義濟厄窮。觀百金爲壽之詞。誠爲過舉。輟一朝享客之費。是在勝流。凡我同盟。知此非僞。

史朝甫鳩金疏

衰繡舊坊。痛家氈之羽化。簪纓故物。存遺址於霜餘。非假熏脩。曷能永遠。昔梁公有廟。以香火而綿長。魏氏故莊。因耕稼以蕪翳。肯堂之志敢替。居室之資孰謀。矧此地號寶奎。湖通碧沚。四世五公之故躅。十洲三島之仙蹤。道氣分紅塵之囂。勝概接紫清之邃。王珣捨宅。虎丘之跡彌芳。賀老棄家。鴻禧之傳益著。願憑衆力。允成勝因。

鞏子固鳩金疏

顏淵希聖。簞瓢之樂有餘。揚雄好玄。觚石之儲不足。道之充者。身愈泰。心之廣者。貧益安。子固經歷游藝精深。養神恬靜。因五行而知貴賤。響若蒼龜。閱千官而審盛衰。明如水鑑。腰難折米。口厭言錢。監河之粟誰償。吏部之金莫奪。廣廈寒士之願。古蓋有之。緹袍故人之情。今斯可矣。一時傾蓋。相與揮毫。

奇禪師住天童疏

身隔片雲。更上玲瓏高處。心如止水。久明清淨本源。行藏不假於脩爲。去住靡容於擬議。僉言推挽。一笑承當。伏惟天童怪石禪師。潛雷在淵。美玉蘊石。法筵擊拂。大辯若訥。以難窮。丈室閉門。掩息如灰。而莫測。澹兮守僧伽之鐵鉢。寂然謬摩尼之寶珠。不滯一方。難違衆論。雲無心而出岫。允稱拈提。水有時而回川。

佇看興復。祝聖主壽。作天人師。

沖禪師住補陀疏

平湖春藹。久居水月之上方。絕岸雲深。要識海潮之瑞相。雖神化無形而應感。在世緣卽境以示真。選衆維公。當仁無忝。伏惟補陀太虛禪師。澄源心鏡。懸河辨鋒。藏室眼空。一滴果投於巨壑。石盤手透。正宗允紹於東巖。對達官不下繩牀。示諸徒靡煩禪板。瞻惟寶刹。上徹紫宸。香幣絡繹於道塗。車馬駢闐於島嶼。發乎邇。見乎遠。變現莫窮。左畫圓。右畫方。應酬非易。敢煩主宰。庸闡拈提。小白花香。證西天之梵語。空青水影。印南海之圓光。顯大士功。祝聖人壽。

壽國堂師住廣恩疏

法王寶刹。殫億劫以莫窮。盛德佳城。考五傳而必復。維樞庭奉先而結構。實木庵受畫以拈据。子爲孫。孫爲玄。初無間隔。公慙卿。卿慙長。卒致荒蕪。羣議交譏。諸方竊笑。伏惟某人。溥洞下之旨益密。爲山中之行最尊。化鶴還家。飛錫歸里。翠浮松柏。儼奇觀之舊模。金透簷楹。增清暉之秀色。祝彤庭壽。廣綠野恩。

南湖十六觀重修疏

想逐心生。由思爲而攝以觀。行隨誠立。積空假以歸于中。推西方清淨之樂邦。解羣生昏垢之苦海。法智尊者。開講席於是山。介然比丘。肇化境於此地。十六觀室。炯銀樹之光明。八千由旬。儼紫臺之芬郁。坐無虛位。儀具清規。巍巍髣髴三聖之現前。拱衛恍諸天之如在。若茲妙所。允勝他方。壞空乃算數之循環。變幻

成劫灰於瞬息。睠維名郡。素號相鄉。信士孔彰。法身不昧。陳諫議以筆墨爲之翊贊。史中令傾金帛盡其莊嚴。古與今同事。由衆舉。掄纓楠於澗谷。采丹牖於陶鈞。蓮花湧七寶之池。貝葉集諸香之案。雲興膚寸。徧龍澤而有年。毛積毫釐。成狐裘之無價。以斯功德。作是因緣。庸報皇恩。咸增佛果。

永禪師還定水疏

百年得意大槐宮。真成一瞬。千載還家華表鶴。今喜重來。山林以之鎮浮。松柏爲之改色。去留何礙。出處無心。東州老禪。骨格老蒼。宗玄真淨。沙盆之破已補。佛法無多。寒厓之倚如春。機心盡掃。厭聽蕉窗之點雨。竟歸茅屋以看雲。塚間之約遽忘。庵外之事漸識。微我弗顧。盍歸乎來。一宿閣中。寧許當年之掉臂。三生石上。會須今日之點頭。水已歸東。車容虛左。

儀師住天台飛瀑寺疏

如來四十二章。已成經論。天台萬八千丈。難與度量。爰開祖庭。以揚教觀。天台飛瀑寺儀公講師。心懸水鏡。辯雨天花。跨遠道以獨游。觸縑塵而無染。方且寄吟詠於畦町之外。追談笑于江湖之間。惠勤來京師。歐公嘗進而與之語。文暢游河朔。柳子亦序以壯其行。二美適同。羣言允愜。挽之不可去矣。奚求飛雪懸厓。拾枯薪而煮茗。清風夾徑。對明月以倚松。迴絕見知。益增定慧。

真禪師住定水疏

古人冢間樹下。是大道場。彼處山色湖光。乃真長物。雖三宿恐成知見。然一擊終有本原。飛錫肯來。虛車

以俟。眞公長老松源嫡嗣。竹閣儒流。大庾嶺擲衣。了無諍語。雙峯山舉拂。允謂報恩。臥白雲以送千帆之飛。斟清泉以展一鉢之供。爲仁由己。斯道覺民。今年貧勝舊年。幸尙有卓錫之地。東澗水流西澗。儼相望埋玉之阡。壽祝三宮。道參七佛。

寶林塔重建疏

如來以不二心。作浮屠相。至人以無縫手。成窣堵緣。瞻茲寶林。名冠東越。平地湧起。實許玄度之勝因。茲山飛來。有徐會稽之妙句。徐浩詩。茲山昔飛來。今有墨本。留寺中。雖佛燈之相續。柰劫灰之屢更。萬里有行。七層儼在中殿。記靈山之會。已爲天下之先。康衢歌擊壤之謠。共效封人之祝。雖云具足。要在合尖。願力精專。等童子聚沙之戲。神通溥博。謝育王使鬼之能。舉筆生風。成功不日。

東嶽興造疏

三宮空洞之中。上通寥廓。四海幅員之廣。實有主維。古稱岱宗。仁竝木帝。伸爲神。屈爲鬼。端假去來。生者養死者。口必資旋轉。三千餘里之太嶽。七十二司之眞官。爰謹鳩工。用嚴象設。居士垂鶴髮而成勝果。詎止一年。懷州號龍興而闡珍符。永祈萬歲。丹青之費雖廣。黑白之業可消。煩孔方兄之點頭。須楮先生之落筆。五穀熟而人民育。造化功深。三階平而陰陽和。生成道廣。

西隱道院重修疏

賀祕監千秋之觀。門有水雲。王大夫安化之廬。居多竹樹。爰宅清淨。以成勝殊。然而絳闕藥宮。乃梵靈之

所幻。桂棟蘭橑。茲地產之所爲。若風落山。木葉盡脫。如舟在水。波濤相淩。故卦氣示還返之方。而丹經著補服之妙。茲維人事。必假衆脩。告于棟梁。視我牆屋。華表驚其如故。鬱羅儼以常新。俾來以圖。還十二樓之森著。神降之福。祝三千歲以遨嬉。

脩桐柏觀疏

福地七十二所之最。允屬金庭。台山萬八千丈之高。實通丹闕。維王子乘雲而稅駕。至仙翁禮斗以建壇。谷神闡靈。山君集異。瀑水千尋而橫練。松花五葉以垂珠。與公之賦。曲盡其瑰奇。擇木之碑。悉書其遠始。瞻茲寶殿。乃開元皇帝之經營。攷彼漆書。肇司馬山人之展布。歲月屢經於代謝。風霜曷任其枝梧。羽人停鶴以興嗟。客子控轡而問故。巍哉道祖。必資螭漚以導迎。縹緲虛皇。宜假靚淵而崇奉。計匠詎涉旬之可集。商財非積萬以莫能。瓊臺何昔日之易成。玉局蓋一時之神化。匪資柱石。曷濟津梁。廳鼠飲河。願早貸清溪之水。精衛填海。當有憐白首之心。煙霞改觀。以翺翔。草木懷新而鼓舞。祝崇萬壽。道贊重玄。